

## Wakita na a puwantaa Paul ge FILAIMAUN

### *Ga use á Paul ge Filaimaun*

<sup>1</sup> Ba iya Paul yá am dangay adaba slera á Yaisu \*Almasiihu, njá ankwá puwaktá wakita na antara egdza emmemiya Timaute, njá puwakante ge ekka Filaimaun, ka ura á njere, slera á miya palle na.

<sup>2</sup> Njá puwakurte ge kure antara egdza emmemiya Afiya antara Arkipus njane una palle á miya am wáwa ge mága slera á Yaisu Almasiihu, ira emnde na tá jáhava am mba á na ge cena waazu na bademme.

<sup>3</sup> Eddemiya Dadaamiya antara Yaakadada Yaisu Almasiihu a magarakuránmaga njurna, a varakurteva hairire.

### *Fetarfire antara wayavire á Filaimaun*

<sup>4</sup> Ba kelaa ma yá ankwá á maga maduwa-aaruwa ádeza Dadaamiya wá, yá slafaná we-aaruwa jipu adaba ka am maduwa-aaruwa.

<sup>5</sup> Adaba cenanáncena labare á na ganakini vakanteva ervaunde á na bademme ge Yaakadada Yaisu \*Almasiihu, wayakaterwaya jipu emnde na ta fetaare áte njane bademme.

<sup>6</sup> Adaba una njanna, yá ankwá njala Dadaamiya jipu geni ba seke una ni gakevge palle antara njere áte barama á Yaisu Almasiihu na wá, yá ankwá á njala Dadaamiya geni de ba á katafke keni ka emmága ba estuwa. Yá njala zlafe,

ganakini ká diyeddiye shagerire á názena ni mi shanaa miya áza Yaisu Almasiihu na.

<sup>7</sup> Egdza emmeruwa, higantehiga jipu arge wayavire na ká aṅkwa maganá ka áte emnde a fetarfe na. Una ṅanna á vite ndzedá jipu ge iya adaba fakateremfa ndzedá am vuwa ge emnde a fetarfe kwakya.

*Paul á slapala Filaimaun arge Unaizimus*

<sup>8</sup> Yá ṅaláká adaba una ṅanna geni ká maga názena yá ndaaka ya. Am ganevge ya slebela á Yaisu \*Almasiihu na wá, yá naba ndaknda názena ká maganá ka bademme.

<sup>9</sup> Amá wá, yá bakanka áte una ṅanna, ya ṅaláká á ba an ṅala an martaapire na am dagave á miya. Iya Paul wá, ganevge emgyegwe a zhele, amá yá am dangay adaba slera á Yaisu Almasiihu.

<sup>10</sup> Yá aṅkwa slapala Unaizimus ázeṅa, adaba ṅane gevge ba seke egdza-aaruwa am dangay áhuna, iya ganevge ba seke eddenjara am elva á Yaisu Almasiihu.

<sup>11</sup> Werre wá, ndza magakánka nampire, amá kina wá, antara ba iya keni á de magamiyánmaga nampire kwakya.

<sup>12</sup> Daaci kwaye yá eptsaká egdze ṅanna á dezeṅa, amá ba seke ya duwaa ba ya an ire-aaruwa.

<sup>13</sup> Am nja-aaruwa kina áhuna am dangay adaba elva á Yaisu Almasiihu na wá, wayanwáyá á meliwa ṅane am kela á ṅa,

<sup>14</sup> amá wayanka yá maganá áte namaari-aaruwa, yá hyakareka an ndzedá geni ká magiyá

shagerire. Arge una ɲanna wá, meliyumele ba ka áte waya á ervaunɲe á ɲa.

<sup>15</sup> Yalla a maganaa ba Dadaamiya ɲeme pakyave á kure antara Unaizimus na, geni á de eptsa zlaɲe ádaliye á de mba á ɲa, kwa de nja kerde náza ba ge kelaazare.

<sup>16</sup> Ma ɲane náve keni wá, kina wá, gevka seke náve mazla-aara, gevge egdza emmemiya. Iya wá, wayanwaya jipu, amá ká de wayaná ba ka kwakya-aara. Zunɲwe wá, ká de wayaná adaba náve á ɲa. Adaliye, adaba ɲane gevge egdza emmeɲa am elva á Yaisu Almasiihu.

<sup>17</sup> Ba seke una ni diyakdiya anɲkwa urire á miya na wá, lyevaalya ɲane, ba seke ka lyevaa ba iya.

<sup>18</sup> Anɲkwa haypa a gakuwaa ɲane emtu? Emtu anɲkwa duksa á ɲa ká dabaná ka ázeɲara emtu? Máki anɲkwa wá, naba ndinda, ká zhárá ba iya.

<sup>19</sup> Am tate na náwa ɲane na wá, yá anɲkwa á puwetá ba iya Paul an erva-aaruwa, geni ya jiranvejire elva-aaruwa na, yá de pelaksepele ba jirire. Amá wá, zlaya á ɲa-ka ni ká ndaviyu duksa ge iya. Adaba shifa á ɲa na ka shanaa ka anwaslire na keni, ya melakuwa ba iya ɲanna.

<sup>20</sup> Ba estuwa egdza emmeruwa, yá ɲaláká adaba Yaakadada, tasle á ɲa maginaamaga názena yá kataná ya ázeɲa na, cekinaaceka higa-aaruwa. Adaba dagave á miya antara ka am elva á Yaisu Almasiihu wá, gamiyevge ba palle.

<sup>21</sup> Ba lauaktu yá puwakte wakita na keni wá, diyandiyá gánakini ká de kwaleka, baira ɲeme ká de januje ka am una yá kataná ya.

<sup>22</sup> Má daada Unaizimus á dem huɲe á há á ɲa wá, tsatsinaatsatse sleɲe-aaruwa keni, adaba

aŋkwa tama-aaruwa geni Dadaamiya á de lye-vaalya ŋála á kure, á de maginaamaga ŋane pute geni yá daada ádezekure.

*Ga use á Paul am halavuwa á elva-aha*

<sup>23</sup> Aŋkwa á gak use-aara Aipafras na ŋá am danḡay kerde adaba elva á Yaisu \*Almasiihu na.

<sup>24</sup> Tara Markus antara Aristarkus, an Daimas an Lukas, itare ta emnde na slera á ŋere palle, itare keni tá aŋkwa á gak use-aatare.

<sup>25</sup> Yaakadada Yaisu Almasiihu a vakurteva hairire-aara.

**Wandala**  
**The Holy Bible in the Wandala language of**  
**Cameroon**  
**La Bible en wandala**

copyright © 1999 Wycliffe Bible Translators, Inc.

Language: Wandala

Contributor: Wycliffe Bible Translators, Inc.

All rights reserved.

2025-05-13

---

PDF generated using Haiola and XeLaTeX on 13 May 2025 from source  
files dated 13 May 2025

dec75dd5-4784-5059-aa00-668d508a6b0d